

et propter hoc esse inungendum, consecrandum et coronandum, deinde mandando per litteras papales omnibus fidelibus regni Romanorum^a, quod ei obediant, concedendo etiam ei legatum de latere, qui eum comitetur, et^b gratiam et favorem, sicut est fieri consuetum. Unde cum fecerit fundamentum, naturaliter debet appettere, ut honorem ipsius ducat dictus dominus papa ad effectum. Ex quo non potest ad presens coronare in Urbe, hec faciat per alium fieri, quod cum nichil reputetur actum, quam diu aliquid superest ad agendum.

§ Secundo.

Quia dictus dominus rex promovendus in imperatorem habens cogitare circa coronationem suam non potest ita adducere ad rem publicam imperii exercendam^c, sicuti si esset coronatus. Propter quod utilitas rei publice huiusmodi^d impeditur, quia pluribus intentus etc.

§ Tercio.

Quia si expectaretur, quod dominus papa pro predictis veniret ad Urbem, et posito quod esset certum quod veniret, hoc non potest fieri ante biennium. Unde si oporteret dictum dominum regem morari interim in Italia, infinita negotia exoriri in diversis provinciis et maxime in Alemann(ia), ubi consueverunt esse rebelles et ubi baronie et etiam comitatus, ducatus et regna tota die confiscantur. Propter que oportet dictum regem ibi proficisci, quod nisi faceret, predicta admitteret. Et si recederet de Italia, delusus esset, confusus et verecundus, nisi esset antea coronatus.

§ Quarto.

Quia quamquam homines intelligentes sciant, quod ex quo dictus rex legitime electus et per dictum papam approbatus habere debeat administrationem in imperio, ac si esset coronatus, tamen quidam querentes nocere et zizaniam seminare suggerunt simplicibus, quod non est ei obediendum, donec fuerit coronatus. Ex qua malitia possent rebelliones plures in dampnum rei publice imperii exoriri.

§ Quinto.

Quia multi barones ex modis, formis et conditionibus in feudis ipsorum et alii ex vigore privilegiorum et consuetudine tenentur ad multa usagia et prestationes facienda . . imperatori post eius coronationem et non ante. Que

a) 'regni Romanorum' auf Rasur. b) Ueber der Zeile. c) 'publicam — exercendam' auf Rasur. d) Auf Rasur.